

7963

Inches 1 2 3 4 5 6 7 8
Centimetres 1 2 3 4 5 6 7 8 9 10 11 12 13 14 15 16 17 18 19



永樂大典卷之七千九百六十三

十九庚

興

紹興府

領縣八舊六新二

山陰

倚郭

上虞

會稽

倚郭

蕭山

新昌

諸暨

舊州

府縣圖

至到

坊巷

鄉都

堰閘

戶口

建置沿革

城池


橋梁

園池

風俗形勢

賦稅


紹興府



土產
山川
寺觀
官制
學校
古蹟
人物


土貢
祠廟
壇壝
解字
兵防
宦蹟
文章

紹興府



東



縣總圖



卷之九

西


紹興府




西

三


山陰




公解圖



會稽



縣圖



山 蕭







圖 縣



姚餘



縣圖



虞 上






圖 縣




系

嵯山




圖


縣



新昌




圖



縣

圖



建置沿革

本府 **大明清類天文分野之書**禹貢揚州之域其山鎮曰會稽牛女之

分。夏禹會諸侯江南計功命曰會稽會稽者會計也。少康封少子無餘於會稽以奉禹祀。號於越。周敬王時有越侯。大鑄子曰允常。僭稱王。允常卒。子勾踐立。為吳夫差所敗。棲於此。後併吳而有其地。後為楚所併。其地盡入于楚。秦始皇二十五年。王翦滅楚。以越併入吳地。共立會稽郡。漢高帝六年。封荆王賈。十二年。封吳王濞。並為會稽郡地。景帝四年。更屬江都國。後國除。罷為郡。東漢順帝永建四年。分浙江以西為吳郡。東為會稽郡。三國吳少帝太平二年。以會稽東部為臨海郡。永安三年。分為建安郡。寶鼎元年。又分為東陽郡。晉為會稽國。咸和四年。改會為鄣。宋孝建元年。分揚州之會稽等五郡置東揚州。齊梁並因之。隋開皇九年。改東揚為吳州。大業元年。又改為越州。三年。罷為會稽郡。唐武德四年。置越州總管。七年。改為都督府。天寶元年。改會稽郡。乾元元年。分置浙江東道節度。治越州。大曆五年。改置浙東觀察使。十一年。省以屬浙西。永貞元年。復置。廣明元年。陞義勝軍節度。五代錢氏據兩浙地。號吳越王。宋至道中。屬兩浙路。又以越州為帥府。紹興六年。陞為紹興路。元為紹興路。屬江浙行省。

本朝為紹興府屬浙江承宣布政司。紹興府志越之封域西北距江抵海東南薄明台金華諸郡內包八縣外周迴幾二千里蓋浙江之甲郡也故於其城郭之所建市鎮之所在鄉鄙之所布道里之所至者不得不詳錄焉若夫府縣之沿革分野之所屬則又皆按夫古書而志焉者也。紹興府一名會稽一名越按舊志自唐虞以來禹平水土別九州時地隸揚州之域禹後會諸侯於江南計功而崩因葬焉遂命其山曰會稽會稽者會計之謂也。至夏后少康封庶子於會稽以奉禹祀其後有勾踐者為越王始號於越及秦始皇降越通浙江東西始置會稽郡以治吳前漢時亦治吳領曲阿烏傷毗陵餘暨陽羨諸暨無錫山陰丹徒餘姚婁上虞海鹽剡由拳太末烏程句章餘杭鄞錢塘鄞富春冶回浦二十六縣後漢順帝永建四年分浙江以西為吳郡海鹽等縣屬焉以東為會稽郡領山陰鄞烏傷餘暨諸暨太末上虞剡餘姚句章鄞章安永寧東候官十四縣治山陰縣章安即回浦永寧分章安而立者東候官即冶縣皆漢光武所改置吳寶鼎元年分會稽置東陽郡以烏傷等縣屬焉會稽領山陰永興諸暨上虞餘姚句章始寧剡鄞十縣內永興即餘暨吳改名始寧即上虞南鄉漢時分置晉改會稽郡為會稽國宋罷會稽郡府復為會稽郡皆統縣十齊

梁陳因之隋改會稽郡為吳州又改越州尋罷州為會稽縣併餘姚鄞鄞入句章縣及剡諸暨統縣凡四唐武德四年又改越州以剡置嵯州并析置剡城縣後廢嵯州為剡縣以鄞屬會稽統縣凡五天寶元年復為會稽郡乾元元年復改為越州宋建炎五年高宗南渡改為紹興府領山陰會稽蕭山諸暨上虞餘姚剡新昌八縣內蕭山即永興唐改名新昌梁錢鏐析剡縣而立者前元改紹興府為紹興路今復為紹興府統縣亦八會稽志越在唐虞時禹平水土制九州而越為揚州之域職方氏東南曰揚州其山鎮曰會稽釋云會稽在山陰舊經云塗山在山陰縣西北禹會萬國之所左傳哀公七年魯大夫曰禹合諸侯於塗山執玉帛者萬國杜預注云塗山在壽春東北說者遂疑塗山非會稽今塗山之名有四會稽壽春之外復有渝州之塗山杜子美賦禹廟詩者文字音義云僉音塗山古國名夏禹娶之今之宣州當塗縣也杜預獨指壽春之塗山為禹合諸侯之地宜必有據然按史記夏本紀贊曰禹會諸侯江南計功而崩因葬焉命曰會稽會稽者會計也裴駟注引皇覽曰禹冢在山陰會稽山上會稽山本名苗山在縣南去縣七里越傳曰禹到大越上苗山大會計爵有德封有功更名苗山曰會稽家語孔子曰昔禹致群臣於會稽之山防風氏後

至禹殺而戮之其骨專車封禪書曰禹封泰山禪會稽由是論之禹既合諸侯於會稽庸詎知魯大夫所謂塗山非會稽歟至夏后帝少康封庶子於會稽以奉守禹之祀文身斷髮披草萊而邑焉後二十餘世至於允常允常之時與吳王闔閭戰而相怨伐允常卒子句踐立是為越王舊經云春秋貶之號為於越按春秋定公五年書於越入吳杜預曰於發聲也西漢云太伯初奔荆蠻荆蠻歸之號曰句吳顏師古云句吳亦猶干越也太伯至德初無貶辭特從其俗爾公羊云於越者未能以名通也穀梁范氏注云春秋即其所以自稱者書之然竊有疑焉越於是時猶未預中國會盟未嘗與中國通也經書於越入吳非越自稱明矣豈書於經者乃吳王告同盟之辭歟哀公二十一年越人始來二十三年魯始使越據此可知且以句踐為君而種蠡為臣果未能以名通者乎定公十四年吳伐越越子句踐禦之陳于檣李句踐患吳之整也使死士再禽焉不動使罪人三行屬劍於頸而辭曰二軍有治臣奸旗鼓不敏於君之行前不敢逃刑敢歸死遂自剄也師屬之目越子因而伐之大敗之靈姑浮以戈擊闔閭闔閭傷將指取其一屨還卒於陘去檣李七里夫差使人立於庭苟出入必謂已曰夫差而忘越王之殺而父乎則對曰唯不敢忘三年乃報越哀公元年

吳王夫差敗越于夫椒報檣李之役也遂入越越子以甲楯五千保于會稽使大夫種因吳太宰嚭以行成吳子將許之伍員曰句踐能親而務施不失人親不棄勞與我同壤而世為仇讎姬之衰也日可俟也介在蠻夷而長寇讎以是求伯必不行矣弗聽三月越及吳平吳越春秋謂吳封地百里於越國語曰句踐之地南至于句無今諸暨有句無亭北至于禦兒今嘉興有禦兒鄉西漢功臣表兩粵傳有語兒侯東至于鄞西至于姑蔑今太末地也廣運百里句踐乃與范蠡深謀二十餘年竟滅吳報會稽之耻北渡兵於淮以臨齊晉號令中國以尊周室致貢於周周元王使人賜句踐胙命為伯諸侯畢賀乃徙都琅邪漢書地理志云琅邪越王句踐嘗治此起館臺有四時祠吳越春秋亦云越王於此起觀臺周七里以望東海句踐卒子王鼂與立王鼂與卒子王不壽立王不壽卒子王翁立王翁卒子王翳立王翳遜國逃於巫山之穴越人薰而出之王翳遜國之賢君蓋吳太伯之儔也王翳卒子王之侯立王之侯卒子王無疆立按此句踐至無疆寔六世舊經云五世者誤也王無疆時與師伐齊西伐楚與中國爭疆當楚威王之時越北伐齊齊威王使人說越王於是越遂釋齊而伐楚楚威王興兵而伐之大敗越殺王無疆盡取故吳地至浙江北破齊

徐州而越以此散諸族子爭立或為王或為君濱於江南海上服朝於楚後七世至閩君搖佐諸侯平秦漢高帝復以搖為越王以奉越後東越閩君皆其後也。會稽郡。秦始皇二十五年大興兵使王翦遂定荆江南地降越君置會稽郡治吳二十六年初并天下用廷尉李斯議分天下以三十六郡郡置守尉監郡守掌治其郡有丞尉掌佐守典武職甲卒監御史掌監郡。漢興高皇帝六年以其地封劉賈為荆王黥布反荆王賈死之無後十二年封劉濞為吳王王三郡五十三城孝景帝四年吳王濞反誅乃復為會稽郡。越絕外傳曰漢孝景五年會稽屬漢屬漢者始并之也。舊經云後復屬江都國江都王建有罪國除乃更為郡按漢書地理志廣陵國注江都易王非廣陵厲王胥皆都此并得鄆郡而不得吳劉貢父云然則會稽不得云屬江都也。吳朱育以強記稱且距漢未遠仕本郡門下書佐太守濮陽興問漢封諸侯事而有所對亦止言劉賈為荆王濞為吳王濞誅乃復為郡治於吳亦不及屬江都事也。前漢志領縣二十六後漢順帝永建四年分浙江以東十四縣為會稽郡治山陰東晉為會稽國改太守為內史宋武帝永初二年罷會稽郡府復為會稽郡齊梁陳因之隋為吳州改越州尋罷州為會稽郡依漢制置太守以司隸刺史相統治唐

武德四年為越州天寶元年復為會稽郡乾元元年復改為越州。越州。越州隋大業置古會稽郡也。因國為名置刺史焉。按漢武帝紀元封五年初置刺史部十三州顏師古曰漢舊儀云初分十三州假刺史印綬有常治所以秋分行部所察六條秩六百石於是乃復禹貢九州之名而增以周之幽并與漢所開之朔方交趾以為十三州也。會稽自昔常隸揚州晉王羲之為會稽內史王述為揚州數檢校郡事羲之耻之求分會稽為越州不果遂稱疾去郡誓墓終身不仕其後至隋而會稽卒為越州蓋本於此。宋齊梁陳會稽自為東揚州刺史不復受察於揚州雖寢異古制然猶未至盡廢刺史之職或以刺史行太守事如曰東揚州刺史領會稽太守是也。隋制舊有兵處刺史帶諸軍事以統之如曰都督會稽等郡諸軍事是也。或加使持節隋唐而降支郡皆稱刺史但領一州而以州統縣與他州等故又於此置總管府以統其屬州隋文帝初平江南改曰吳州大業中遂改為越州尋罷州置郡以刺史十四人巡察畿外諸郡所察六條略如漢制唐武德四年復為越州置總管領州如故未久改總管為都督自是改更不常郡則曰太守州則曰刺史其實一也。至乾元元年遂為越州大抵越州其實與會稽郡同非復如漢十三州之重刺史亦非復古之部

刺史但以總管都督制一道爾。紹興府。宋建炎三年十月庚申車駕自杭州巡幸。御樓船渡浙江。壬辰幸越州。四年四月癸未御舟自溫台回。駐蹕越州。明年正月一日改元紹興。越州官吏軍民僧道上表乞賜府額。昔唐德宗以興元元年巡幸梁州改梁州為興元府。於是朝廷用興元故事改越州為紹興府。初車駕幸揚州駐蹕逾年。又嘗經郊祀。然未嘗建為府。則紹興蓋特恩也。車駕既移蹕臨安。首命前叅知政事資政殿學士原本缺。故守謝到任表曰。矧是肇新府號久駐原本缺。之故棲厲嘗膽枕戈之志。想神禹之遺迹。服卑官菲食之勞。又謝賜行宮充本府治所表曰。廣廈千間。已免震凌之患。土階三尺。尚存簡素之風。皆言上駐蹕之久而官室無所增葺也。浙東提點刑獄曾喚舊為史官。見日曆所書紹興二年正月車駕移蹕臨安。閏四月戊戌。詔紹興府行宮復作府治。上曰。時方艱難。若不賜與。則須別建。賜之所以寬民力也。州額初題越州大都督府。既賜府額。當題云紹興大都督府。而右朝奉大夫吳說乃題云大都督紹興府。議者或非之。歷代屬州。會稽郡。自漢順帝時還治山陰。其所領山陰鄞烏傷餘暨諸暨太末上虞剡餘姚句章鄞章安永寧東候官猶十四縣。其地南踰閩越。西限浙江。東止至海而止。提封數千里。粵自

秦漢常為都會。晉渡江後。三吳之豪請都會稽。雖不果。亦足見當是時會稽最號富實。常為本根之地。故諸葛恢為會稽帝謂曰。今之會稽。昔之關中也。宋書史臣曰。江左以來。根本於揚越。又云。會土帶海傍湖。良疇數十萬頃。膏腴土地。畝直一金。鄞杜之間。不能比也。又袁宏漢紀。許子將曰。會稽富實。策之所貪。以此論之。會稽自古以富實名者。徒以鏡湖之利也。今民盜湖為田。湖廢幾盡。按晉宋間。謂會稽為會土。三國志。謂吳郡會稽為吳會。二郡。張紘謂收兵吳會。則荆揚可一。孫賁傳云。策已平吳會二郡。未桓傳云。部伍吳會二郡是也。前輩有讀會字為都會之會。或者以為不然。今姑蘇有吳會館。蓋承其誤。後漢末。孫策略平江左。渡浙江。自領會稽太守。策卒。曹操又表其弟權為會稽太守。以統江左諸郡。三國志云。策渡浙江。以其屬吳景為丹陽太守。孫賁為豫章太守。孫轉為廬陵太守。朱治為吳郡太守。而策自領會稽太守是也。孫權謂虞翻曰。孤有征討。事未得還。府。卿復以功曹為吾蕭何守會稽耳。興平四年。策乃分章安永寧之地置松楊縣。吳錄云。取松楊木為名。又置始平縣。改章安曰羅陽縣。至吳孫亮太平二年。又置臨海縣。立會稽東部為臨海郡。以臨海始平松楊羅陽四縣屬焉。於是會稽始有屬郡。初後漢建安中。孫氏分東候官之地立邑。即

以年號為名曰建安縣。據續通典云：孫策建安十二年立。按是時策已死，又置南平、漢興二縣以屬會稽南部都尉。至孫休永安三年，遂割會稽南部為建安郡。孫皓寶鼎元年，又以漢末以來分烏傷、太末之地，所立新安、豐安、長山、吳寧、遂昌、永康、定陽并烏傷、太末凡九縣置東陽郡。至晉又分臨海郡之松楊、羅陽、東陽郡之遂昌凡三縣立永嘉郡。乃今處州。晉既平吳，立東侯官為晉安郡，分隸揚州。東晉以會稽郡為王國，併隸揚州。宋永初二年正月，罷會稽郡，府遂復為郡。孝建元年，立為東揚州，統會稽、東陽、新安、臨海、永嘉五郡。大明三年，以揚州所統六郡為王畿，而東揚州直為揚州。以豫章王子尚為刺史，加都督。八年冬，復以王畿諸郡為揚州，而會稽還為東揚州，統郡如故。永光元年秋八月，始改是年為景和元年。東揚州併揚州。梁普通六年，復以會稽、東陽、新安、臨海、永嘉五郡及建安、晉安二郡立東揚州。大寶二年，湘東王繹承制，以陳霸先為都督，會稽、東陽、新安、臨海、永嘉五郡諸軍事。東揚州刺史領會稽太守承聖三年，以陳霸先都督會稽十郡諸軍事。會稽太守陳永定三年，改永嘉郡為縉州，尋省東揚州併屬揚州。又分建安、晉安二郡權立閩州。天嘉元年，以徐度為使持節都督會稽、東陽、臨海、永嘉、新安、新寧、信安、建安、晉安九郡諸軍事，鎮東將

軍。會稽太守。天嘉三年，侯安都破留異、東陽平。六月，以會稽、東陽、臨海、永嘉、新安、新寧、晉安、建安八郡置東揚州，以揚州刺史始興王伯茂為鎮東將軍。東揚州刺史。光大二年，割東揚州、晉安郡為豐州。隋開皇九年，改東揚州曰吳州，置總管府。煬帝大業元年正月，廢諸州總管府，尋改吳州為越州。改東陽郡為婺州。又改永嘉郡為處州，尋改為括州。而廢臨海郡。大業三年四月壬辰，改州為郡。越州曰會稽郡，婺州曰東陽郡，括州曰永嘉郡。唐武德四年，平李子通，改會稽郡為越州，置總管府。改東陽郡為婺州，永嘉郡為括州。復故臨海郡為海州。復故建安郡為建州。又以剡縣立嵎州，并析置剡城縣。析故句章縣地置姚州，鄞州以烏傷縣地為綱縣，置綱州，并析置華川縣。析信安縣置衢州，以龍丘縣地置穀州，并析置白石縣。以縉雲縣地置麗州，以松楊縣置松州，以桐廬分水建德三縣置嚴州。五年，以永嘉縣置東嘉州，并析置永寧、安固、橫陽、樂成四縣屬焉。是歲改海州為台州。七年，改總管為都督府，廢姚州入餘姚縣，來屬。廢綱州入烏傷縣，更名義烏屬婺州。廢嚴州，以桐廬縣屬睦州。八年，廢鄞州，以鄞縣來屬。廢穀州，以白石縣入信安縣。廢麗州為永康縣，屬婺州。廢松州為松楊縣，貞觀元年廢東嘉州。省橫陽、永寧二縣，以永嘉、安固二縣併隸括州。廢嵎州，以

剡縣來屬是歲始命併省分天下為十道越州督越婺泉建台括六州隸江南道高宗上元二年又分括州之永嘉安固兩縣置温州垂拱二年又析婺州之常山信安龍丘復置衢州景雲二年分天下為二十四都督府以統其屬州越州所督不滿十州定為中都督府既而以其權重皆罷之開元二十一年分隸江南東道開元二十六年採訪使齊澣奏割鄞縣置明州天寶元年改越州為會稽郡温州為永嘉郡而括州為縉雲郡台州為臨海郡明州為餘姚郡建州為建安郡衢州為信安郡乾元元年復改會稽郡為越州縉雲郡為括州信安郡為衢州永嘉郡為温州餘姚郡為明州東陽郡為婺州臨海郡為台州新定郡為睦州領越睦衢婺台明處溫八州治越州隸浙江東道大曆十四年廢浙江東道建中元年復置二

年復廢貞元三年復置浙江東道領越婺台明衢處溫七州而睦州隸浙江西道皇朝因之紹興元年升為紹興府所領州如故歷代屬縣前

漢志會稽郡治吳領縣二十六吳曲阿烏傷毗陵餘暨陽羨諸暨無錫山陰丹徒餘姚婁上虞海鹽剡由拳太末烏程句章餘杭鄞錢塘鄞富春冶回浦舊經云光武改回浦曰章安以冶立東候官分章安立永寧縣通典云永嘉本漢冶縣地後漢改為章安續通典云漢書東甌舉國內徙乃以

其地為回浦縣屬會稽郡後更名章安又以章安之東甌鄉為永寧縣隋為永嘉縣初西漢以粵反覆險阻為後世患遷其民江淮遂虛其地後有遁逃山谷者稍出立為冶縣顏師古注云越王冶鑄之地後又名為東冶縣後漢光武時又曰東候官今閩縣是也言東以別其西如閩縣居候官之東故曰東候官以此又知候官之名已久冶之地不一後因其名以為縣也一云秦立胡候之官於此故名通典云後漢分冶地為會稽東南二部都尉此為南部都尉東部今臨海是也大抵南至晉安東至章安皆冶縣地詳而言之則閩越為冶而東甌為回浦原其本皆粵地也順帝永建四年陽羨人一作陽羨令周嘉上書以吳越一國周旋一萬一千里以浙江山川險絕求得分置遂分浙江以西為吳郡以東為會稽郡三國志吳未育云永建四年劉府君上書以浙江之北為吳郡會稽還治山陰舊經云領山陰鄞烏傷餘暨諸暨太末上虞剡餘姚句章鄞章安永寧東候官十四縣治山陰又分上虞南鄉為始寧縣初平三年分太末縣置新安縣分烏傷南鄉為長山縣興平二年分諸暨之大門村為漢寧縣又分章安之南鄉為松楊縣建安四年孫氏分太末立豐安縣又分信安立定陽縣建安二十三年分太末立平昌縣晉志曰遂昌吳分永寧立南始平縣今

之天台又分烏傷之上浦為永康縣分章安立臨海縣改章安為羅陽縣
餘暨曰永興縣漢寧曰吳寧縣吳少帝太平二年以會稽東部為臨海郡
分臨海南始平松楊羅陽四縣屬焉續通典云孫策於建安十二年分東
候官之地立邑即以年號為名曰建安縣屬會稽南部都尉三國志云永
安三年以會稽南部為建安郡而縣為屬孫皓寶鼎元年分會稽為東陽
郡以烏傷太末新安豐安長山吳寧平昌永康定陽九縣屬焉而會稽領
山陰永興諸暨上虞餘姚句章始寧剡鄞十縣晉地道志宋州郡志領
縣皆十隋平陳廢山陰永興上虞始寧為會稽縣併餘姚鄞入句章縣
及剡諸暨統縣四唐武德四年以剡置嵎州并析置剡城縣析句章之餘
姚置姚州析句章之鄞置鄞州七年輔公柝平廢姚州以餘姚縣來屬析
會稽立山陰縣八年廢鄞州為鄞縣嵎州為剡縣並來屬省山陰縣復入
會稽凡統縣五垂拱二年復置山陰縣儀鳳二年復置永興縣開元二十
六年割鄞縣置明州天寶元年改永興為蕭山縣大曆二年因刺史薛兼
訓之奏省山陰縣七年刺史陳少遊復奏置馬貞元元年刺史王審奏置
上虞縣元和十年又省山陰入會稽縣十年復置梁開平中錢鏐析剡縣
立新昌縣皇朝因之領會稽山陰蕭山諸暨上虞餘姚剡新昌八縣宣和

三年方臘既平七月丁卯詔越州剡縣改名嵎縣與睦州改嚴州歙州改
徽州及睦州青溪縣改淳安衢州龍游縣改盈川皆同時也廢州會
稽郡漢領縣二十六至漢末六朝而降析會稽所隸縣為郡今為州軍二
十四會稽一郡獨領漢故縣餘暨諸暨山陰餘姚上虞剡凡六亦可謂盛
矣至唐初以州境獨大於它州故析剡縣為剡城縣立嵎州析餘姚縣為
姚州武德七年廢姚州復以餘姚縣來屬貞觀元年廢嵎州復以剡縣來
屬廢縣漢順帝時分上虞南鄉為始寧縣隋平陳廢興平二年分諸
暨大門村為漢寧縣吳改為吳寧縣寶鼎元年割隸東陽郡後復併入諸
暨今縣有大門里或云即其地也唐武德四年析剡為剡城縣武德七年
廢入剡縣乾道八年分諸暨之楓橋鎮為義安縣淳熙元年廢入諸暨縣
初戶部侍郎方公滋以吏事著一時典藩數十年所至有聲績其置縣雖
承史蔣二公之後然卒成之者方公也亦嘗為客言析縣之利它日當愈
見不可復併矣然曾未幾時遂為後守所廢徹取官署等以建僧寺人頗
議之至或謂有大姓居邑中方為鎮時擅事權握利柄役服小民無敢與
較故大不利於建縣云昔在夏禹會諸侯於會稽歷三千歲而我高宗
皇帝御龍舟橫濤江應天順動復禹之迹駐蹕彌年定中興之業群盜削

平強虜退遁於是用唐幸梁州故事陞州為府冠以紀元大駕既西幸而
府遂為股肱近藩稱東諸侯之首地望益視長安之陝洛汴都之陳許所
命牧守皆領浙東安撫使其自丞相執政來與去而拜丞相執政者不可
遽數而又昭慈聖烈皇后及永祐以來四陵攢殿相望於鬱葱佳氣中朝
謁之使艦銜轂擊中原未清今天下鉅鎮惟金陵與會稽耳荆揚梁益潭
廣皆莫敢望也則山川圖謀宜其廣載備書顧未暇及者餘數十年直龍圖
閣沈公作賓來為守慨然以為己任而通判府事施君宿發其端安撫司
幹辦公事李君兼韓君茂卿為之助郡士馮景中陸子虞王度朱鼎永嘉
邵持正等相與上參禹貢下考太史公及歷代史金匱石室之藏旁及爾
雅本草道釋之書裨官野史所傳神林鬼區幽怪恍惚之說秦漢晉唐以
降金石刻歌詩賦詠殘章斷簡靡有遺者若父老以口相傳不見於文字
者亦間見層出積勞累月乃成沈公去為轉運副使猶經營此書不已華
文閣待制趙公不迹寶文閣學士袁公說友繼為守亦力成之而始終其
事者施君也書雖本之圖經圖經出於先朝非藩郡所可附益乃用長安河南
成都相臺之比名會稽志會稽為郡雖遷徙靡常而郡本以山得名又禹
所巡也故卒以名之既成屬游參訂其槩且為之序嘉泰元年十二月乙

酉中大夫直華文閣致仕賜紫金魚袋陸游序會稽續志會稽志作於嘉
泰辛酉距今二十有五年夫物有變遷事有沿革今昔不可同日語也况
城府內外斬然一新則越又非曩之越矣苟不隨時紀錄後將何所攷昔
虞翻未育答郡太守問會稽古今事應對如流纖悉弗遺當時但嘆其殫
洽殊不知二公皆里人也其習熟有非一日誤雖世本中原僑寓是邦蓋
有年矣山川風土之詳人材物產之富與夫事物之沿革變遷曩嘗訪聞
茲又目擊於越事亦粗稔懼其久而遺忘輒哀輯而彙次之總為一編曰
會稽續志所書固辛酉以後事而前志一時偶有遺逸者因追補之疎畧
者因增廣之譌誤者因是正之異時有問我以越事敢執此以謝寶慶元
年三月旦日梁國張湜序

山陰縣

大明清類

天文分野之書

周越王

勾踐之都

秦始皇三十七年

移大越曰山陰以邑在山之陰故也為縣屬會稽郡漢為郡都尉治順帝

永建四年分浙江以東為會稽郡治山陰晉以後並因之隋併入會稽唐

武德七年析會稽立山陰縣八年省垂拱二年復置大曆二年省七年復

置元和七年又省十年復置與會稽分治郭下宋為望邑元屬紹興路
本朝因之紹興府志山陰為縣按前漢志會稽郡領縣二十六山陰居其一

隋平陳廢山陰及上虞等四縣為會稽縣唐武德七年析會稽立山陰縣八年併山陰縣復入會稽垂拱二年復置山陰縣大曆二年復革山陰七年復置焉宋元及

本朝因之不改舊志山陰縣本越王勾踐之都會稽土地志曰邑在山陰故以名焉舊志又云山陰之名得之於秦寰宇記山陰縣舊十二鄉今十五鄉本秦舊縣置在會稽山北龜山西漢以為郡都尉所居宋畧云會稽山陰編戶三萬號為天下繁劇王羲之云每行山陰道上如鏡中遊王子敬見潭壑澄澈清流瀉注乃云山川之美使人應接不暇隋末廢併入會稽唐武德四年又置貞觀元年又廢垂拱二年又分會稽置大曆二年又廢七年刺史陳少遊又奏置之至元和七年併入會稽蕭山兩縣至十年又置之興地廣記望山陰縣秦漢以來故縣隋平陳省入會稽縣唐垂拱二年復置在州郭下與會稽分治有鑑湖東漢永和五年太守馬臻所創開周回三百餘里溉田九千餘頃創湖之始多浸冢墓有千餘人怨訴臻因被刑於市及遣使覆按總不見人籍乃知死者所訴也有龜山一名怪山一名自來山本自琅琊東武飛來於此其形似龜故名有蘭溪溪口有亭曰蘭亭晉太守王羲之作曲水序於此元一統志會稽志云本越王勾踐

之都秦始皇三十七年東遊於此徙大越曰山陰以邑在山之陰故也西漢志曰會稽山在南上有禹冢禹井本靈文園顏注曰靈文侯薄太后父也自元至元十三年收附後定為上

會稽縣

大明清類天文分野之書夏禹方行天下還歸大越會計修國

之道以會稽名山仍為地號周越王棲于會稽即此山也秦始皇二十五年置會稽郡併置山陰縣漢以為郡治宋齊梁並因之隋併山陰等四縣入會稽縣為會稽郡治唐武德七年分置山陰縣八年省垂拱二年復分置山陰縣自此與山陰常分治郭下宋因之元屬紹興路

本朝因之

紹興府志會稽為縣元係郡名隋平陳廢郡屬縣山陰永興上虞

始寧為會稽縣唐武德七年省山陰縣復入會稽垂拱二年析會稽復入山陰縣儀鳳二年析會稽復置永興縣即今蕭山縣也大曆二年省山陰縣復入會稽七年析會稽復置山陰縣貞元元年析會稽復置上虞縣元和十年又省山陰入會稽尋於會稽析置山陰縣宋元因之不改興地廣記望會稽縣本於越地禹會諸侯江南計功而崩因葬焉命曰會稽會稽者會計也其後帝少康封庶子杼於會稽以奉守禹祀即越王允常之先也秦置山陰縣屬會稽郡漢因之東漢順帝以後為郡治晉因之後分置

會稽縣。隋為吳州。越州及會稽郡治。唐因之。南有會稽山。秦始皇於此刻石紀功。有禹冢。禹穴。有秦望山。在州城正南。為眾峯之傑。始皇登之。以望東海。山南有嵯峴。峴有大城。越之先君無餘。舊都于此。有鏡湖。若耶溪。雷門。

上虞縣。大明清類天文分野之書。夏禹與諸侯會計。因相虞樂於此。故曰上虞。又以為舜封支庶於會稽。故邑有上虞。秦屬會稽郡。漢初因之。順

帝時。分上虞南鄉為始寧縣。晉因之。陳省入會稽。隋罷上虞。存始興。唐貞元元年。復置。穆宗長慶中。移治今所。宋元並屬紹興。

本朝因之。紹興府志。本縣為會稽屬邑。舊志云。秦漢以來。上虞皆屬會稽郡。

王莽改上虞曰會稽。光武復舊名。晉仍漢舊。故有分載上虞始寧之名。唐貞元中。廢始寧。復置上虞。宋元因之。皆屬紹興府。寰宇記。上虞縣。舊十三鄉。今一十四鄉。漢縣地理志云。屬會稽郡。唐長慶初。廢併其地入餘姚。後

復置。移於此。理元一統志。圖經引會稽十三州志云。夏禹與諸侯會計。因相虞樂於此。故曰上虞。華鎮又引雜記云。舜封支庶於會稽。故邑有上虞。秦漢以來。皆屬會稽郡。唐志云。貞元元年。刺史王密奏。復置上虞。穆宗長慶中。移治今所。宋以來為望縣。自元至元十三年。收附後定為中。

蕭山縣。大明清類天文分野之書。周吳王闔閭弟夫槩之邑。本日餘暨。

漢為餘槩縣。三國吳孫權改曰永興縣。晉因之。隋省入會稽。唐儀鳳二年。復置永興縣。天寶元年。改名蕭山。取縣西蕭然山為名。宋元屬紹興路。

本朝因之。紹興府志。蕭山為縣。自前漢始。初名餘槩。隋平陳廢入會稽縣。唐

天寶元年。改為蕭山縣。宋元因之。不改。郡縣志。緊蕭山縣。府西北一百里。漢書應劭注云。漢分諸暨山陰地為下諸暨。後易名餘槩。屬會稽郡。至吳

孫氏改為永興。隋併入會稽。唐儀鳳二年。又自會稽分置興地。廣記。緊蕭山縣。本餘暨縣。漢屬會稽郡。晉因之。隋省入會稽縣。唐儀鳳二年。復置屬

越州。天寶元年。改曰蕭山縣。有蕭山。潘水所出。水經以為疑。是浦陽江之別名。自外無水以應之。越人西施出於此縣。元一統志。元和郡縣志云。本

曰餘槩。吳王闔閭弟夫槩之邑。吳孫權改曰蕭山。興地。廣記曰。漢末童謠曰。天子當興東南三餘之間。故孫權改曰永興縣。晉因之。與元和志所紀不同。西漢地理志云。王莽改曰餘衍。今詳按兩漢志。會稽郡下並有餘暨。而無永興。晉志。會稽郡下有永興。而無餘暨。則是吳孫權改餘暨為永興。非改餘暨為蕭山。沈約宋志於永興縣下亦云。漢舊餘暨縣。吳更名永興。則吳孫權未嘗更為蕭山也。元和志所紀非是。今不取。又隋平陳廢永興。

入會稽唐志蕭山縣下注云儀鳳二年置永興縣天寶元年更名蕭山取縣西蕭然山以為名宋因之稱緊邑自元至元十三年收附後定為中

嵎縣大明清類天文分野之書漢本剡縣順帝時屬會稽郡三國吳賀

齊為今移治今所唐武德四年以縣為嵎州分置剡城縣八年州罷仍為剡縣宋宣和三年改為嵎縣取四山為嵎之義元屬紹興路

本朝因之紹興府志嵎為縣初名剡按前漢志會稽郡領縣二十六剡居其一

梁開平中析剡縣三之一置新昌縣宋宣和三年知越州劉述古言剡有兵火象欲以嵎名縣詔從之元因之不改寰宇記剡縣舊四十鄉今二十七鄉漢舊縣後漢順帝以浙江東十三縣為會稽郡剡亦屬焉孔曄記

縣本在江東賀齊為剡令移于今所隋末陷李子通唐武德四年平賊以剡為嵎州六年廢嵎州依舊為剡縣元一統志本漢剡縣宋郡邑志云宣

和三年平方臘知州事劉述古奏剡字兩火一刃有兵火象請改之遂易為嵎縣有嵎山東西南北皆有秀峯取四山為嵎之義至今因之舊望邑

元至元十三年收附後定為上

新昌縣大明清類天文分野之書漢剡縣地梁開平二年吳越王分剡縣之石牛鎮置新昌縣宋元並屬紹興路

本朝因之紹興府志新昌古無是邑梁開平二年吳越王錢鏐析剡三之一始置新昌縣宋元因之不改寰宇記新昌縣十三鄉唐末錢鏐割據錢塘

時以去温州之道路悠遠此地人物稍繁且無館驛乃析剡縣一十三鄉置新昌縣元一統志本東漢剡縣舊曰地名南明號石牛鎮梁開平二年

吳越王錢鏐以此地人物稍繁始分剡縣十三鄉置新昌縣後併其鄉為八至宋因之舊為緊邑元至元十三年收附後定為中

餘姚縣大明清類天文分野之書秦以餘姚之地為縣屬會稽郡以昔為舜後支庶所封舜姓姚故曰餘姚漢晉宋齊並因之隋省入句章縣唐

武德四年分故句章縣置餘姚縣又以縣置姚州七年州罷以來屬焉宋因之元貞元年陞為州屬紹興路

本朝以為縣紹興府志餘姚之名始見前漢書地理志周處風土記云漢會稽郡領縣二十六餘姚其一也自漢至陳縣之所隸不易隋平陳併餘姚

入句章縣唐武德四年析句章之餘姚為姚州七年廢姚州復為餘姚縣隸越州開元二十六年析越州鄞縣置明州改明州為餘姚郡乾元元年

郡復為州其後餘姚隸明州至宋復隸越州元貞元年以餘姚之戶餘四萬陞為州今復為縣云郡縣志望餘姚縣府東北一百四十七里漢舊

四萬陞為州今復為縣云郡縣志望餘姚縣府東北一百四十七里漢舊

縣在餘姚山西。山海經云：勾餘之山，無草木，多金玉。郭璞注云：在會稽餘姚縣南。句章縣北。元一統志：會稽志風土記云：秦漢為縣，屬會稽郡。元和郡志云：隋平陳省入句章縣。唐武德四年，析故句章縣置餘姚縣，以縣置姚州。七年，州廢，以縣來屬宋，因之為望邑。元定為上屬紹興路。

諸暨縣 大明清類天文分野之書：周越王允常所都秦舊縣，漢為諸暨

縣屬會稽郡。興平二年，分立吳寧縣。宋乾道八年，以其地之楓橋鎮置義安縣。後省。元貞元年，陞為州，屬紹興路。

本朝以為縣。紹興府志：本縣為越允常所封舊邑。西有楮山，北有槩浦。以楮字省木，槩字音相連，因山浦以為名。或言越得吳封，無諸與夫槩於此邑，上取諸字，下取槩字，因封邑以為名。漢興平二年，分諸暨之大門村為漢寧縣。吳改為吳寧縣。寶鼎元年，割隸東陽郡。復併入諸暨。宋乾道八年，分諸暨之楓橋鎮為義安縣。後廢入諸暨。元因各色戶計五萬三千九百七十八戶，陞為州。今復為諸暨縣。郡縣志：望諸暨縣府西南一百四十二里。越王允常之故邑。國語所謂南至句無，即此也。漢為縣，縣界有槩浦諸山，因以名之。歷代不改。元一統志：沈約宋志云：漢舊縣，宋會要云：乾道八年，以諸暨之楓橋鎮置義安縣。淳熙元年，後省，止存諸暨。至今因之，舊是望

邑。元定為上屬紹興路。

分野

紹興府志：禹貢隸揚州之域。周禮保章氏以星土辨九州之地，所封封域皆有分星，以視吉凶。星紀吳越也。漢書地理志云：吳地斗分野。會稽志云：今之會稽，九江丹陽、豫章、廬江、廣陵、六安、臨淮、郡盡吳分也。越地牽牛婺女之分野。會稽志云：其君禹後，帝少康之庶子，封於會稽。虞翻以為會稽上應牽牛之宿，當少陽之位。東漸巨海，西通五湖，南暢無垠，北渚浙江，南山攸居，實為州鎮。春秋左氏傳：吳伍員曰：句踐與我同壤，夫差亦曰：越之與吳同土連域，然則吳越同壤，其來久矣。按晉書天文志曰：自南斗十二度至須女七度為星紀，於辰為丑。吳越分曰揚州，而會稽入牛一度。春秋元命包曰：牽牛流為揚州，分為越國。會稽志云：左傳昭公三十二年，夏，吳伐越。史墨曰：不及四十年，越其有吳乎？越得歲而吳伐之，必受其凶。漢永嘉中，歲星熒惑太白聚牛女之間，識者以為吳越之分。其後孫策孫權實有江左，晉太元間，符堅將入寇，石越對曰：今歲在吳分，天道不順，已而堅果敗去。及陳叔寶將亡，有星孛于牽牛，以此放之，則斗牛之分，吳越同之信矣。會稽志云：班固別而言之，恐有未然。

至到

本府紹興府志東至明州府慈溪縣地名桐下湖界二百里。自界到明州府治一百一十里。計三百一十里。西至杭州府富陽縣地名塘口關界一百三十五里。自界到杭州府富陽縣治七十里。共計二百五里。南至金華府東陽縣地名應村為界二百五里。自界到金華府東陽縣治六十里。共計二百六十五里。北至三江海口二十一里。東南到台州府天台縣地名關領為界二百八十五里。自界到台州府治一百三十五里。計四百二十里。東北到明州府慈溪縣地名洋浦雙河為界二百四十里。西南到金華府浦江縣地名楊墓嶺為界一百九十里。自界到浦江縣四十里。計二百三十里。西北到杭州府錢塘江中流為界一百一十九里。自界到杭州府治一十九里。計一百三十八里。會稽志云。東至慶元府慈溪縣界一百五十七里。西至臨安府錢塘縣界一百三十八里。南至台州天台縣界二百九十五里。北至海一百一里。東西二百三十二里。南北四百四十七里。至東京二千四百七十里。西京二千八百七十里。郡縣志云。至東京二千四百五十里。東至慶元府二百七十二里。西至臨安府一百六十九里。南至台州四百九十五里。北至海

一百一里。東南至台州四百六十九里。西南至臨安府四百二十二里。東北至慶元府三百五十七里。西北至臨安府一百三十三里。寰宇記。東北至東京二千四百五十里。西北至西京二千八百七十里。至長安三千七百三十里。東至明州二百七十里。西至杭州一百三十里。南至台州天台縣關嶺一百三十六里。北至海與蘇州分界一百三十里。東南至台州四百七十五里。西南至婺州三百九十里。東北至淡江海際三百九十八里。九域志云。大都督府越州會稽郡鎮東軍節度治會稽山陰二縣。至東京二千四百七十里。東至本州界一百五十七里。自界首至明州一百一十五里。西至本州界一百三十八里。自界首至杭州三十一里。南至本州界二百九十五里。自界首至台州二百里。北至海一百一里。東南至本州界三百五里。自界首至台州一百六十四里。西南至本州界一百九十一里。自界首至杭州二百三十里。東北至本州界二百二十七里。自界首至明州一百三十里。西北至本州界一百一十五里。自界首至杭州一十八里。元一統志云。西北至上都四千八百九十五里。西北至大都四千九百九十五里。東至慶元路慈溪縣界一百九十里。西至杭州路界一百三十八里。南至

台州路天台縣界二百四十五里。北至大海一百一里。東到慶元路三百一十里。西到建德路三百七十里。南到台州路三百八十里。北到大海一百一里。東南到慶元路三百五十里。東北到大海一百一十里。西南到婺州路三百五十里。西北到杭州路一百七十一里。江浙須知自本路至大都陸路四千九百一十五里。水路四千六百一十里。東至慶元路界地名桐下湖橋一百九十里。西至杭州路界地名浙江中流一百三十八里。南至台州路界地名關嶺二百四十五里。北至大海一百一里。

山陰縣 東至會稽橋為界一里一百四十六步。到會稽五十七步。西至蕭山縣錢清浮橋為界六十二里。到蕭山縣三十八里。共計一百里。南至諸暨縣界五十里。北至三江海口二十一里。東南至會稽縣界地名覆釜嶺四十里。東北至會稽縣界地名宋家淩二十八里。西南至諸暨縣界古博嶺五十里。自界到諸暨縣七十里。共一百二十里。西至白洋海岸五十五里。會稽志云。望山陰縣。本越王句踐之都。會稽土地志云。邑在山陰。故以名焉。東西九十八里。南北一百一十八里。東至會稽縣界一百五十步。以運河中流為界。自界至會稽縣六十步。西至

蕭山縣界五十三里。以西小河中流為界。自界至蕭山縣五十里。南至諸暨縣界七十里。以古博嶺為界。自界至諸暨縣一百四十三里。北至海一百五里。海北岸即嘉興府界。東南到會稽縣界一百六十六步。西南到蕭山縣界五十八里。東北到會稽縣界五十八里。西北到蕭山縣界四十七里。元一統志云。西北至上都四千八百九十五里。西北至大都四千九十五里。北至本路三里。東至會稽縣運河界一百五十步。西至蕭山縣小江界五十三里。南至諸暨州古博嶺界四十五里。北至大海三十五里。東到本路三里。西到蕭山縣一百三里。南到諸暨州一百二十里。北到大海三十五里。東南到嵎縣一百五十七里。西南到諸暨州一百一十里。東北到會稽縣三里。西北到蕭山縣九十七里。

會稽縣 東至上虞縣界八十五里。以曹娥江中流為界。至上虞縣三十五里。計一百二十里。西至山陰縣界五十七步。以縣西橋河中流為界。自界至山陰縣一里一百四十六步。計一里二百三十三步。南至嵎縣界一百二十里。以孫家嶺為界。自界至嵎縣六十里。計一百八十里。北至桑盆岸一十八里。過海北岸接嘉興府界。東南到嵎縣地名三界一百三

十里。東北到本縣地名延德鄉海岸六十五里。西南到山陰縣地名覆釜嶺二十里。西北到山陰縣地名宋家淩一十八里。會稽志云。望會稽縣。本山陰縣地。隋廢山陰。更置會稽縣。為會稽郡治。唐垂拱二年。復分置山陰。並在府郭下。東西一百二十四里。南北一百三十里。東至上虞縣界九十二里。以東小江中流為界。自界至上虞縣二十八里。西至山陰縣界六十步。以運河中流為界。自界至山陰縣一百五十步。南至嵎縣一百二十里。以孫家嶺為界。自界至嵎縣五十五里。北至海二十里。過海北岸接嘉興府界。東南到嵎縣界一百四十里。西南到山陰縣界三里一十步。東北到上虞縣界七十五里。西北到山陰縣界三里二步。元一統志云。西北至上都四千八百九十五里。西北至大都四千九百十五里。西至本路治一百八十步。東至上虞縣界小江九十二里。西至山陰縣界運河六十步。南至嵎縣界杉木嶺一百里。北至大海三十里。東到上虞縣一百二十里。西到本路四里。南到嵎縣一百五十五里。北到大海三十里。東南到上虞縣一百三十五里。西北到山陰縣三里。東北到上虞縣一百二十里。西北到蕭山縣九十七里。

上虞縣。東至餘姚縣小查湖二十八里。自界到餘姚縣三十二里。計六十里。西至會稽縣界曹娥江中流三十五里。自界到會稽縣八十五里。計一百二十里。南至嵎縣界郁嶺七十里。自界至嵎縣六十里。計一百三十里。北至大海四十五里。過海北岸係嘉興府。東南至餘姚竺溪嶺三十里。東北至本縣夏蓋山海岸三十五里。西南到嵎縣會稽地名三界九十里。自界到嵎縣四十里。計一百三十里。西北到會稽縣界延德鄉海岸八十七里。過海會稽界。會稽志云。望上虞縣。十三州志云。夏禹與諸侯會計。因相虞樂於此地。故曰上虞。在府東一百二十里。東西五十三里。南北一百一里。東至餘姚縣界二十八里。以新橋為界。自界至餘姚縣四十五里。西至會稽縣界二十八里。以曹娥江中流為界。自界至會稽縣九十二里。南至嵎縣界七十里。以郁嶺石床鋪為界。自界至嵎縣六十里。北至海四十五里。過海北岸即嘉興府界。東南到餘姚縣界四十五里。西南到嵎縣界九十里。東北到餘姚縣二十里。西北到會稽縣界八十七里。元一統志云。西北至上都五千一十五里。西至大都四千二百一十八里。西至本路一百二十里。東至餘姚州界二十八里。西至會稽縣界二十八里。南至嵎縣界七十里。北

至大海四十里。東到餘姚州六十里。西到會稽縣一百二十里。南到嵊縣一百三十里。北到大海四十五里。東南到餘姚州六十五里。西南到會稽縣一百二十里。東北到餘姚州六十五里。西北到會稽縣一百三十五里。

蕭山縣 東至山陰縣錢清界三十八里。自界到山陰縣六十二里。共一百里。西至杭州府錢塘縣界錢塘江中一十九里。自界轉北到錢塘縣一十九里。共三十八里。南至本府諸暨縣界里亭湖橋六十里。自界到諸暨縣八十里。共一百四十里。北至大海二十五里。東南至山陰縣界小江口二十五里。西南至杭州府富陽縣界塘口關三十五里。東北至山陰縣界白洋海岸三十五里。西北至杭州府仁和縣界錢塘江中一十九里。自界到仁和錢塘二縣一十九里。共三十八里。會稽志云：緊蕭山縣本吳王闔閭弟夫槩之邑。以縣西蕭然山為名。在府西北一百里九十步。東西六十二里。南北九十里。東至山陰縣界五十里。以西小江中流為界。自界至山陰縣五十三里。西至臨安府錢塘縣界二十三里。以浙江中流為界。自界至錢塘縣三十里。南至諸暨縣界六十五里。以勞嶺為界。自界至諸暨縣六十五里。北至臨安府錢塘縣三十五里。以浙

江中流為界。自界至錢塘縣四十七里。東南到山陰縣界五十一里。西南到臨安府錢塘縣界四十八里。東北到山陰縣界四十九里。西北到臨安府錢塘縣界一十五里。元一統志云：西北至上都四千七百七十七里。西北至大都二千九百七十七里。東至本路一百里。東至山陰縣界五十里。西至杭州路錢塘縣界二十三里。南至諸暨州界六十五里。北至杭州路仁和縣界三十五里。東到山陰縣一百三十三里。西到杭州路錢塘縣五十三里。南到諸暨州一百二十里。北到杭州路仁和縣八十里。東南到山陰縣九十七里。東北到杭州路鹽官縣五十四里。西南到杭州路富陽縣九十里。西北到富陽縣八十里。嵊縣 東至明州府奉化縣界陸詔嶺六十里。自界到奉化縣八十里。計一百四十里。西至諸暨縣界皂莢嶺七十五里。自界到諸暨縣八十五里。計一百六十五里。南至新昌縣界胡塢一十八里。自界到新昌縣一十七里。計三十五里。北至會稽縣孫家嶺六十里。自界到會稽縣一百二十里。計一百八十里。東南至明州府奉化縣界箬坑嶺一百三十里。自界到奉化縣一百二十里。計二百五十里。東北至本府新昌縣界郁嶺六十里。自界到新昌縣六十八里。計一百二十八里。西南至金華府東

陽縣界白峯嶺八十里。自界到東陽縣八十五里。計一百六十五里。西北至本府上虞會稽縣界五十里。自界到本府一百三十里。計一百八十里。會稽志云。望嵎縣。本漢剡縣。道書云。兩火一刀可以逃。言剡多名山。可以避災也。宣和三年改今名。縣有嵎山。水經注。嵎山與嵎山峯嶺相連。又云。東有葦山。南有黃山。西有白山。為縣之秀峯。嵎山在北。乃四山為嵎之義。在府東南一百八十里。東西二百七十六里。南北一百七十六里。東至慶元府奉化縣界一百四十里。以陸詔嶺為界。自界至奉化縣一百里。西至諸暨縣界一百三十六里。以勞嶺為界。自界至諸暨縣七十三里。南至新昌縣界一十五里。以胡塏為界。自界至新昌縣一十五里。北至會稽縣界五十五里。以池湖驛為界。自界至會稽縣一百四十里。東南到新昌縣界一十五里。西南到婺州東陽縣界九十里。東北到會稽縣界六十二里。西北到會稽縣界六十二里。元一統志云。西北至上都五千四十五里。西北至大都四千二百四十八里。北至本路一百五十里。東至慶元路奉化縣界一百一十里。西至諸暨州界一百二十六里。東到新昌縣三十里。西到諸暨州二百九里。南到新昌縣三十里。北到會稽縣一百五十五里。東南到新昌縣三十五里。

東北到新昌縣四十五里。西南到婺州東陽縣一百七十二里。西北到山陰縣一百五十七里。

新昌縣。東至台州府寧海縣松樹嶺一百二十里。西至嵎縣界一十八里。南至台州府天台縣界石壘嶺寨七十五里。自界到天台縣五十八里。共一百二十五里。北至嵎縣湖塏渡一十七里。自界到嵎縣一十八里。共三十五里。東南至台州府天台縣關嶺七十五里。自界到天台縣四十五里。共一百二十里。西南至嵎縣郁嶺六十八里。自界到嵎縣六十里。共一百二十八里。東北至明州府奉化縣剡界嶺八十里。自界到奉化縣一百里。共一百八十里。西北至嵎縣小坑嶺三十里。會稽志云。緊新昌縣。本剡縣地。唐末錢氏析十三鄉。置新昌縣。後併其鄉為八。在府東南二百二十里。東西八十里。南北一百五里。東至嵎縣界五十里。以孝嘉鄉為界。自界至嵎縣二十里。西至嵎縣界三十里。以烏巖溪為界。自界至嵎縣二十里。南至台州天台縣界七十五里。以祥鸞鄉為界。自界至天台縣六十四里。北至嵎縣界三十里。以王宅後溪為界。自界至嵎縣二十五里。東南到台州天台縣界八十五里。西南到嵎縣界一十五里。東北到嵎縣界二十五里。西北到嵎縣界一十五里。元一

統志云。西北至上都五千七十五里。西北至大都四千二百七十八里。北至本路一百八十里。東至台州路寧海縣界一百里。西至嵎縣界一十五里。南至天台縣界五十五里。北至嵎縣界一十五里。東到奉化縣二百四十里。西到嵎縣三十里。南到天台縣一百五里。西南到嵎縣四十五里。北到嵎縣三十里。東南到天台縣一百五里。西北到嵎縣三十五里。東北到奉化縣一百八十里。西北到嵎縣三十五里。

餘姚縣。東至明州府慈溪縣桐下湖橋分界二十里。自界到慈溪縣六十里。共八十里。西至本府上虞縣小查湖分界三十二里。自界到上虞縣二十八里。共六十里。南至明州府奉化縣白蓮庄分界八十五里。北至大海四十五里。東南至明州府慈溪縣石門分界二十五里。自界到慈溪縣一百里。共一百二十里。東北至明州府慈溪縣雙河洋浦分界六十里。自界到慈溪縣八十里。共一百四十里。西南至本府上虞縣竺溪嶺分界三十里。西北至本府上虞縣夏蓋山海岸分界七十五里。

會稽志云。望餘姚縣。周處風土記云。舜後支庶所封。舜姓姚。故曰餘姚。在府東北一百四十七里。東西六十里。南北二百六十里。東至慶元府慈溪縣界一十里。以桐下湖橋為界。自界至慈溪縣八十里。西至上虞縣

界四十五里。以新橋為界。自界至上虞縣二十里。南至嵎縣界一百六十一里。以黎州山為界。自界至嵎縣三百里。北至海三十五里。過海北岸接平江府界。東南到慶元府慈溪縣界三十五里。西北到上虞縣界四十五里。東北到慶元府慈溪縣界八十里。西北到上虞縣界六十里。元一統志云。西北至上都五千七十五里。西北至大都四千二百七十八里。西至本路一百八十里。東至慶元路慈溪縣界一十里。西至上虞縣界三十二里。南至嵎縣界一百六十一里。北至大海三十五里。東到慶元路慈溪縣九十里。西到上虞縣六十里。南到嵎縣一百六十五里。北到大海三十五里。東南到慶元路慈溪縣八十里。西南到上虞縣六十五里。東北到慶元路慈溪縣八十里。西北到上虞縣六十五里。

諸暨縣。東至本府嵎縣界皂莢嶺八十五里。自界到嵎縣七十五里。共一百六十里。西至杭州府富陽縣界雀門嶺八十一里。自界轉北到富陽縣七十九里。共一百六十里。南至金華府義烏縣界善坑嶺六十里。自界到義烏縣六十里。共一百二十里。北至本府蕭山縣里亭湖橋八十里。自界至蕭山縣六十里。共一百四十里。東南至金華府東陽縣應

村七十五里。自界到東陽縣六十里。共一百三十五里。東北至本府山陰縣界古博嶺七十里。自界到山陰縣五十里。共一百二十里。西南至金華府浦江縣界楊墓嶺七十里。自界到浦江縣四十里。共一百一十里。西北至杭州府富陽縣界塘口關八十里。會稽志云：望諸暨縣。本越王允常所都。或言西有楮山。北有槩浦。諸文省暨音近。因山浦以為名也。或言無諸舊封。夫槩故邑。上取諸。下取槩。因封邑以為名也。在府西南一百四十二里。東西一百六十里。南北一百六十一里。東至嵊縣界八十三里。以茆峴嶺為界。自界至嵊縣一百二十六里。西至臨安府富陽縣界八十一里。以黃峴嶺為界。自界至富陽縣一百二十六里。南至婺州浦江縣界七十里。以新界官道為界。自界至浦江縣五十里。北至蕭山縣界九十一里。以南亭浦為界。自界至蕭山縣九十二里。東南到婺州東陽縣界一百二十里。西南到臨安府富陽縣界五十里二百步。東北到山陰縣界八十一里。西北到蕭山縣界七十里。元一統志云：西北至上都四千九百一十四里。西北至大都四千一百一十四里。東北至本路一百一十里。東至嵊縣界八十三里。西至婺州路浦江縣界六十八里。南至婺州路東陽縣界一百三十里。北至本路蕭山縣界六

十五里。東到嵊縣二百九里。西到婺州路浦江縣一百三十里。南到婺州路東陽縣一百九十里。北到蕭山縣一百二十里。東南到婺州路東陽縣一百九十五里。東北到山陰縣一百一十里。西南到婺州路浦江縣一百三十里。西北到蕭山縣一百三十五里。

道路水路附

會稽志 山陰縣 東路來自會稽縣界經縣界五十四里。西入蕭山縣界

南路來自諸暨縣界經縣界二百二十里。至海岸過海入嘉興府界。

西小江水路。東南來自諸暨縣界經縣界五十五里。西北入蕭山縣界勝

舟五百石。運河水路。東來自會稽縣界經縣界五十三里。一百六十步。

西入蕭山縣界勝舟五百石。

會稽縣 東路來自上虞縣界經縣界九十三里。西入山陰縣界。南路

來自嵊縣界經縣界一百六十里。北至海岸過海入嘉興府界。東南路

來自嵊縣界經縣界一百七十里。西入山陰縣界。西南路來自山陰縣

界經縣界一百五里。東北入上虞縣界。曹娥江路。南來自上虞縣界經

縣界四十里。北入海。勝舟五百石。若邪溪路南來自縣五雲鄉界經縣

界二十五里。北入鏡湖。勝舟五十石。

上虞縣 東路來自餘姚縣界經縣界五十三里西入會稽縣界 南路
來自嵊縣界經縣界一百一十里北至海岸過海入嘉興府界 上虞江
路在縣西二十八里南來自嵊縣界經縣界一百九十里西入會稽縣界
大信潮勝舟五百石小信潮勝舟二百石 運河路在縣南二百二十步
東來自餘姚縣界經縣界五十三里六十步西入會稽縣界勝舟二百石
蕭山縣 東路來自山陰縣界經縣界六十二里西入臨安府錢塘縣界
南路來自諸暨縣界經縣界九十里北入臨安府鹽官縣界 浦陽路
南來自諸暨縣界經縣界一百五十六里北入山陰縣界勝舟二百石
運河路東來自山陰縣界經縣界六十二里西入臨安府錢塘縣界勝舟
二百石
嵊縣 東路來自慶元府奉化縣界經縣界一百七十六里西入諸暨縣
界 南路來自新昌縣界經縣界一百七十六里北入會稽縣界 剡溪
路西南來自婺州東陽縣界經縣界一百四十里東北入上虞縣界勝舟
一百石
新昌縣 東路來自嵊縣界經縣界六十里西復入嵊縣界 南路來自
台州天台縣界經縣界一百里北入嵊縣界見舊經東南通台州天台縣

一百五里 西北通嵊縣三十里 東小路通慶元府奉化縣一百二十
里 西南通婺州東陽縣一百八十里
餘姚縣 東路來自慶元府慈溪縣界經縣界六十里西入上虞縣界
南路來自嵊縣界經縣界二百六十里北至海岸過海入平江府界 餘
姚江路西來自上虞縣界經縣界五十五里東入慶元府慈溪縣界勝舟
五百石
諸暨縣 東路來自嵊縣界經縣界一百六十三里西入臨安府富陽縣
界 南路來自婺州浦江縣界經縣界一百六十里北入蕭山縣界 東
南路來自婺州東陽縣界經縣界二百里東北入山陰縣界 西路來自
臨安府富陽縣界經縣界一百二十里西北入蕭山縣界 浣江路東南
來自安俗鄉界經縣界九十一里
北入蕭山縣界勝舟二百石



